

Lescha ed ordinaziun da linguas entran en vigur per il 1. da schaner

(cc) La lescha da linguas dal chantun Grischun vegn messa en vigur per il 1. da schaner 2008. Quai ha concludì la regenza grischuna. Il medem mument ha ella relaschè in'ordinaziun da linguas. Quella concretisescha diversas disposiziuns da la lescha da linguas ed entra er en vigur il cumenzament da l'onn nov.

Ils 17 da zercladur 2007 han las votantas grischunas ed ils votants grischuns acceptà la lescha da linguas dal chantun Grischun cun 22 582 cunter 19 334 vuschs. Ils intents da la lescha da linguas èn tranter auter quels da rinforzar la trilinguitad sco element essenzial dal chantun e da fixar la conscienza per la plurilinguitad chantunala. La nova lescha da linguas regla il diever da las trais linguas uffizialas dal chantun – rumantsch, talian e tudestg – tras il cussegl grond, tras la regenza, tras l'administraziun e tras las dretgiras chantunalas. Ultra da quai fixe-scha la lescha da linguas las mesiras, cun las qualas las linguas minoritaras chantunalas – rumantsch e talian – duain vegnir mantegnidas e promovidas. La finala circumscriva la lescha, co che las linguas uffizialas e las linguas da scola en las vischnancas ed en ils circuls vegnan determinadas.

Differentas disposiziuns da la lescha da linguas vegnan ussa concretisadas en l'ordinaziun da linguas. Las regulaziuns detagliadas davart il diever da las linguas chantunalas uffizialas tras las autoritads chantunalas correspundan en quest connex per gronda part als princips che valan gia oz. Plinavant vegnan reglads ils princips davart las prestaziuns finanzialas dal chantun a las organisaziuns linguisticas – vul dir a la lia rumantscha ed a la pro Grigioni italiano – ed a l'agentura da novitads rumantscha. Da nov survegnan las organisaziuns linguisticas contribuziuns sin basa da cunvegns da prestaziun. Quellas valan quatter onns. En quest connex importan las contribuziuns chantunalas tranter 10 e 30 pertschient da las expensas totalas decisivas. Ultra da quai cuntegna l'ordinaziun disposiziuns davart il pajament da contribuziuns a projects ed a mesiras da promoziun spezialas sco er a scolas bilinguas ed a programs da barat tranter las cuminanzas linguisticas.